

عصير النجاة



نورا يسى

مقدمة

ولاني اعلم ان فترة الامتحانات يكون بها الوقت ضيق لن اطيل عليكم في مقدمة

ولنبداً ...



- سؤال هام جدا يجب ان تجيب عليه قبل المذاكرة

انا ليه بذاكر؟؟

و بالتاكيد هتكون الاجابة اكيد يعني عشان ادخل انجح في الامتحان ودا من اول الاسباب اللي بتخليك تحس انك في ضغط لان كل تركيزك بيكون علي الامتحان فقط وبيخلي نطاق تفكيرك ضيق فا بتبدأ تحس ان المعلومة ثقيلة عليك جدا في مقابل انك لو في يوم عادي قرئت الكتاب دا هتحمس بسهولة المعلومات

وعشان كدا لازم تبطل تفكير ان بتذاكر عشان الامتحان وعشان تنجح علي فكرة ممكن تكون مذاكر كويس جدا وتدخل متعرفش تحل حاجة بتحصل ودا بيكون سببها انك وترت نفسك بفكرة ورهبة الامتحان

خلينا نغير مبرر ان احنا بذاكر عشان الامتحان نخليه اشمل واعم من كدا شوية

مثال

انا بذاكر عشان عندي هدف اني اخرج من الكلية وانا حاصل علي تقدير امتياز لان دا هيساعدني في اني اشتغل في مجال معين واني بعد الكلية او اثنائها هاخذ كورسات تخليني اتطور في المجال دا ولو مش حابب المجال دا وحاسس بعدم فائدة اللي بتدرسه زي مواد كتير في التعليم اعتبره معلومات عامة ممكن في يوم تحتاجها (حاجات كتير كنت فاكرة مش هستفيد منها اثناء الدراسة وكانت اكثر الحاجات اللي فادتنني في حياتي العملية)

- قبل المذاكرة شيل من دماغك اي فكرة سلبية

زي انا مش هفلح انا لوو جبت مقبول او مثلا ٧٠% يبقى كتر خير الدنيا الفكرة السلبية بتتحقق و الفكرة الايجابية بتتحقق بالاضافة انك بتعملك لنفسك حالة احباط من قبل اصلا ما تبدأ تذاكر فا اول لما تمسك الكتاب انت بعث لمخك اشارة انه يقف عن التفكير و الحفظ و الفهم لانك عملته حدود ادراكية يعني كأنك كلمت مخك قولته استيعابك هيكون ٢٠% او عي تستوعب اكثر من كدا

- حط هدف ونية

قبل ما تبدأ في المذاكرة حط نية انك بتذاكر ليه عشان ربنا يكرمك حتي لو حاجة بسيطة زي مثلا لما اتعلم الكتابة و القراية هقدر اني اطوع في جمعية خيرية في محو الامية او هينفع اي شخص بياي حاجة لو بسيطة (الموضوع دا رغم انه بسيط جدا بيفرق جدا جدا) وافتكرو حديث المصطفى

قال رسول الله صلى الله عليه وسلم من خرج في طلب العلم كان في سبيل الله حتى يرجع يعني شوف اهمية العلم قد ايه لو حطيت نية هتاجر علي كل حرف بتذاكره وربنا هيفتح عليك

- الهدف

زي اي طالب مصري بيحط جدول وميلتزمش بيه و الكلمة المشهورة هذاكر من بكرة ودا بيكون سببه ضعف الهدف من المذاكرة عشان كدا لازم هدفك يكون قوي وزي ما قولنا قبل كدا خليه اشمل واعم من انك تنجح في الامتحان

- الاصحاب و الاهل و المذاكرة

لو اصحابك من النوع المحبط من نوعيه (متعملناش فيها عم الدحيح _ انت اصلا فاشل _ تقدير ايه اللي عايز تجيبه احمد ربنا لو نجحت اصلا) فا نصحية متقولش عن اي نية ليك او هدف من المذاكرة او حتي رغبة في انك تجيب تقدير معين يعني مثلا متروحش تقولهم انا نفسي اجيب امتياز لانهم هيحبطوك اشتغل علي نفسك اكثر من انك تصرح عن اهدافك اعزل نفسك عن اي كلمة احباط من اللي حواليك

نفس الحكاية مع الاهل

اي ام مصرية اصيلة هتقولك ابقني قابلني لو نجحت عادي جدا متاخذش الكلمة بحساسية واثبتلها انك تقدر فعلا تنجح وبتقدير

من الآخر متهمش بكلام حد حوالياك لو كان سلبي بس خد بالك من الانتقادات ممكن يكون عندهم حق لو عندك قصور في نقطة حاول انك تعدلها مش انك تتكبر علي النصحية لكن لو احباط متهمش بيه

- الاكل ايام الامتحانات

قبل المذاكرة كل حاجة مسكرة شكولاتيه اشرب عصير بس متكترش من السكريات يعني هي حاجة واحدة بس
ابعد عن الاكل اللي فيه دهون واللي بييسبب الوخم زي محشي بطرقاق اي اكل بسمنة الاكل من بره
لو مدخن قلل من التدخين وقت المذاكرة لانه بييسبب خمول
كتر من اكل الفاكهه والخضار
وانت بتذاكر لو من النوع اللي لازم تاكل حاجة مع المذاكرة خلي جمبك طبق فيه خس _ خيار
_ جزر _ فلفل الوان
المنبهات : ناس كتير فاكرة انها بتساعد علي التركيز ولكن كتر المنبهات بيكون غلط
المسموح كوباية قهوة يوميا او كوبايتين نسكافيه

ومن اضرار المنبهات

تؤثر بشكل كبير على المراكز الهامة في الجهاز العصبي مثل →

(1) مركز التنفس الموجود في جذع الدماغ.

(2) المركز المسؤول في انقباض وانبساط الأوعية الدموية.

(3) المركز المثبط لضربات القلب.

- استبدل افكارك السلبية بأفكار ايجابية

الفكرة هنا انك اول لما تيجي فكرة سلبية في دماغك وانت بتذاكر فورا تكتب عكسها ودي
هنعملها في جدول

مثال

فكرة ايجابية	فكرة سلبية
عارف اذاكر والمذاكرة بسيطة	مش عارف اذاكر
هعرف احفظ الجزئية دي ان شاء الله وهفهمها بس اركز	مش عارف احفظ / افهم حاجة
الامتحان هيجي بإذن الله كويس وهعرف احل	الامتحان هيجي صعب جدا وهسقط ومش هعرف احل

غضب عنك وانت بتذاكر هتيجي افكار سلبية في دماغك استعيز بالله من الشيطان الرجيم
واكتب عكس الفكرة السلبية اكتب الايجابي بتاعها ولما تيجي تقرأ اللي كتبتة اقرأ الجزء
الايجابي فقط كله ورا بعضه

مثلا

انا عارف اذاكر والمذاكرة بسيطة وهعرف احفظ الجزئية دي ان شاء الله وهفهمها بس اركز
و الامتحان هيجي بإذن الله كويس وهعرف احل

دا مش وهم انت بتتكلم مع مخك وبتبعته اشارات ايجابية هتخليه يستقبل كم كبير من
العلوم لان اصلا المخ بيستوعب معلومة جديدة كل ثانية يعني موضوع اصل المعلومات
كثير و دماغي وقفت دا مش حقيقي انت بتوهم نفسك بعكس حقيقتك

اعرف كدا دايا قاعدة مهمة جدا

الفكرة السلبية مش هتفيدك باي شئ بالعكس هضرك لكن الفكرة الايجابية حتي لو منفعتكش ()
مع انها بالتأكيد هتنفعك () فهي مش هتسببلك اي ضرر خليك متفائل واتبع كلام رسولك الكريم
تفائلوا بالخير تجدوه

- طرق المذاكرة

ذاكر بالطريقة اللي تريحك واللي متعود عليها وحاسس انك بتنجز بيها عايز تسمع حاجة وانت بتذاكر رغم ان دا مش مستحب وهيسببك تشتت وهيخلي جزء من مخك مع الموسيقي او الشئ اللي بتسمعه لكن لو دا بيرحك وهيخليك تذاكر اسمع بس ياريت تكون حاجة هادية عشان متشغلش جزء كبير من عقلك

وهنا عرض عليكم طرق انجاز المذاكرة ايام الامتحانات

لو بتذاكر حاجة ادبية او محتاجة حفظ كتير ومفيهاش نقاط هتكون اسهل طريقة في الحفظ هي الطريقة التالية

مثلا عندك ٣٠٠ صفحة هتذاكرهم متخضش من عدد الصفح وتدي اشارات مسبقة لعقلك انه مش هيستعوبها

قسمهم وهتلاقي انهم بيخلصوا بسرعه

هتجيب اول صفحة مثلا وتقرأها قرايه جرايد قرايه سريعه جدا ولكن بتركيز وبعديين معاك ورقة وقلم هتقرأ بهدوء وتطلع الكلمات اللي ممكن تفكرك بالصفحة دي وكانت بتتكلم عن ايه اكتبها حتى لو باللغة العامية بالطريقة اللي تخليك تفتكرها وتشرح الكلام اللي في الصفحة كأنك بتفهم حد او كتاب بتقراه عادي وبتحكي لحد مكتوب فيه ايه دا هيساعدك جدا انك تحفظ اعمل عناوين لنفسك جوه الصفحة حتى لو هي مفهاش عناوين علم علي نقطة معينة وسمي الفقرة اي عنوان الصفحة بالظبط هتخلص حفظها في ١٠ دقائق بالكثير وكل لما بتتعود علي الطريقة المدة بتقل

تاني جزء : لو بتذاكر حاجة محتاجة حفظ وفيها نقط كتير دا افضل طريقة لحفظه الخرائط الذهنية

مثال توضيحي افتراضي :

السؤال : خصائص وسلوكيات الشخصية الابتكارية

١- يجب أن يميلون الي ان يكونوا مبتهجين ومرحين اكثر من كونهم شديدي الذكاء فا الذكاء غير العادي ليس شرطا للقدرة علي الخلق و الابتكار ولكن ذوي التفكير الابتكاري لديهم

القدرة علي طرح الكثير من الافكار المختلفة في زمن قصير

٢- أن يميلون إلي أن تكون لديهم صورة ذهنية طيبة و ايجابية عن انفسهم ولديهم القدرة علي التمييز بين الثقة بالنفس و الغرور

٣- يعبرون عن انفسهم دائما بشكل عاطفي ومدركون ما يجري حولهم من احداث ويدركون كذلك مشاعر و احساس الاخرين

٤- يهتمون بصفة اساسية بطبيعة المشكلة ذاتها كما انهم ينظرون الي المشكلات علي انها تمثل نوعا من التحدي لقدراتهم ومصدرا لاثبات الذات


٥- في العادة يوجل الاشخاص الابتكاريون الحكم علي اي قضية او مشكلة حتي يتمكنوا من تجميع حقائق كافية عن المشكلة

طريقة الخريطة الذهنية لحفظ هذا السؤال

في الشكل الموضح الدائرة الموجودة في النص بتكتب الفكرة الرئيسية و حولها النقط الفرعية في النقط الفرعية بتكتب الكلمة اللي بتفكرك بالنقطة نفسها وعند المذاكرة اقرأ النقط بنفس الترتيب مثال تحفظ نقطة رقم واحد بعدها رقم ٢ بعدها رقم ٣ متجيش مرة تقرأ او تحفظ نقطة رقم ١ وبعدين نقطة رقم ٥ لازم عينك تتعود انك هتحفظ في اتجاه معين عشان في الامتحان هتفكر بالتدريب لانك اشتغلت علي النقطة البصرية فامحك هيفتكر بالصور

ملاحظة

لو عندك نقط كثير عايزة تتحفظ وحاسس انك برضو متلغبط نوع في الاشكال مرة سؤال اعمله مربع ومرة سؤال اعمله علي شكل مثلث اي شكل يخليك تربط السؤال بالخريطة



- الجزئية الثانية

لو بتذاكر حاجة عملية او نظريات او مسائل محاسبة

هتجيب اول مسئلة مثلا في البداية معاك ورقة وقلم هتشوف خطوات حلها الاول مثلا لو حلها
٥ صفحات

هتشوف الخطوة رقم ١ حصل فيها ايه بعدها ضربت ايه في ايه بعدها حطيت انهي معدلة
وهتبدأ تكتب خطوات حل المسئلة الضرائب مثلا

١ / هجيب معطيات

٢ / هضرب دا في دا

٣ / هطبق المعادلة الفلانية (ممكن تسمى المعادلات بياي اسم يفكرك بيها سواء ارقام او
اسماء اي حاجة تفكرك بالمعادلة اعمل عمليه ربط بين المعادلات لانها بتتنسي بشئ هو في
ذاكرتك حتي لو شئ فكاهي حتي لو اسم اغنية دا بيقل من توترك وانت بتذاكر وحاسس انك
تايهه بين المعادلات وفي نفس الوقت بتعمل حاجة اسمها رابط نفسي بين المعادلة وحاجة
انت علي طول بتفتكرها)

بعدها هتحل المسئلة بالورقة و القلم ومفيش مانع تبص علي الحل لكن تاني مرة تحلها من
غير ما تبص علي اي حل حتي لو هتحلها غلط وترجع بعد لما تخلصها تشوف الحل لو غلط
علم بقلم لون مختلف علي الغلط واكتب انت غلطك ايه و الصح ايه لو عندك وقت حل مسئلة
غيرها وارجع حلها تاني لو معندكش وقت راجع خطوات الحل بسرعه وراجع علي غلطك

– افضل زمان ومكان للمذاكرة

الزمان والوقت المناسب والافضل للمذاكرة في الثلث الاخير من الليل حتي بعد الفجر بس مش
معني كدا انك تطبق لان انك تكون نايم كويس دا شئ مهم ممكن تنام بدري وتصحي في
الوقت دا ولو ساعتك البيولوجية متعوده علي وقت معين متقلبش نظام يومك عشان وقت معين
ذاكر في الوقت اللي متعود عليه ولكن الوقت دا بيكون كويس لسبب بسيط
ان ربنا سبحانه وتعالى بيتنزل الي السماء الدنيا ويقول من يدعوني فاستجب له من يسألني
فأعطيه من يستغفرني فأغفر له ؟

فا عندك فرصة كبيرة انك تدعي ربنا ويستجيب ليك الوقت دا بيكون لربنا رحمت وبيفتح اوي
علي اي واحد في المذاكرة او اي شئ بيعمله صلي ركعتين قضاء حاجة واقعد ذاكر هتحس
بطمئينة وانت بتذاكر

افضل مكان للمذاكرة

يفضل يكون مكان فيه تهوية جيدة ومنظم بس فيه ناس مبتعرفش تذاكر غير والمكان فوضي
حولها وثبت علميا ان الفوضويين مبدعين فامفيس مشاكل

- تمرين قبل او اثناء المذاكرة

التمرين بسيط هيساعدك انك تفوق وبيزيد من نشاطك

هتاخذ نفس عميق (شهيق) بمقدار ٤ عدات وهاخرجه بكل قوتك كأنك بتنفخ
هتعمله ٣ مرات دا بيساعد علي وصول الدم للمخ وبيزيد من تركيزك

- ليلة الامتحان

لو انت مذاكر قبلها هتكون المراجعة كلها بطريقة الخرايط الذهنية اللي انت حضرتها وهتلاقي انها مش بتاخذ منك وقت خالص في المراجعة بالكثير اوي ساعه المسائل ممكن تعيد حلها تاني بس قبلها تقرأ ورقة الخطوات اللي عملتها

اما لو مذاكرتش حاجة خالص

متوترش نفسك لان الوقت مش مستحمل توتر التوتر هياخر وصول المعلومة وهيضرك
ملهوش لازمة

(دايمًا اعرف اول لما يجيك توترك او قلق اعرف انه هيعطك يعني الحاجة اللي ممكن تخلصها في نص ساعه هتخلها في ساعه وساعتين فا هو هيضرك يبقي اهدي والحق الوقت الباقي فإنك تذاكر وممكن تلم المنهج كله)

- قصة واقعية

كان عندي ٤ امتحانات في يومين ورا بعض و ٤ مواد اتقل مواد باخذها اول يوم مكنش فيه مشكلة لان كان عندي ٣ ايام فاضية قبلها تاني يوم هو اللي كان مشكلة لاني هخلص امتحان الساعة ٦ بليل وهروح تبقي ٧ او بعد كذا كمان
روحت نمت من ٩ لي ١ انا معرفش اي حاجة عن المادتين اللي همتحن فيهم بدأت بأصعبهم بالنسبالي خدت وقت من ١ لي ٥ كانت عبارة عن ٣٠٠ صفحة ونظريات ومعادلات والحمد لله جبت فيها امتياز مع مرتبة الشرف و المادة الثانية ذاكرتها بعدها من ٦ لي ٩ لو كنت اتوترت لضيق الوقت مكنتش هعرف اذاكر لادي ولادي

بلاش التليفونات من صحابك وبالذات لو مش مذاكرين زيك لانها هضيعلك وقت كبير جدا مفيش وقت تقسم اللي هتذاكره ابدأ مذاكرة من البداية بالترتيب من غير تقسيم وعمل جدول وبرضو هتذاكر بنفس طريقة اللي قولنا عليها فوق لانها اسرع طريقة تحصيل

- يوم الامتحان هتكلم بإذن الله

ودلوقتي جه اليوم المنتظر اللي فيه بتكون متوترة جدا وبتكون حاسس انك نسيت كل حاجة (ظاهرة طبيعية جدا)
وتتعد وانت رايح الامتحان تسمع في دماغك وتحس انك مش عارف تجمع اجابة السؤال علي بعضه وتيجي تراجع قدام اللجنة فين اللي ذاكرته مش فاكرك حاجة خالص كل دا طبيعي متقلقش لان عقلك متخزن فيه المعلومات اللي ذاكرتها لما هيتحط في حاله استدعاء للمعلومة هيجيبها

قبل الامتحان بساعه

- مينفعش تحفظ حاجة جديدة او تخلي حد يشرحك حاجة ولو انت من النوع اللي بيتلخبط لو شرح لحد جزء فاهمه يبقي متشرحش لحد حاجة ودا مش كتم المعلومة انفع غيرك اه لكن مضرش نفسك
- المراجع لو حاسس انك ناسي كل حاجة هتبقى بورق الخرائط اللي عملته او بخطوات حل المسائل اللي انت كتبتهم وانت بتذاكر وتكون قرايه سريعه جدا لان العقل اللاواعي بيستقبل المعلومات لما بتتقال بطريقة سريعه

- قدام اللجنة هتلاقي ممكن اللي يقول دا انا مذاكرتش حاجة خالص و اللي يقول انا مش فاكرك حاجة خالص وانا هسقط ابعده نفسك عن اي مصدر قلق وكل اللي عليك في الوقت دا بعد لما تخلص قرايه الخرائط و خطوات حل المسائل تذكر ربنا وتدعيه يوفقك
قبل الامتحان بنص ساعه متمسكش اي مذكرة ليها علاقة بالمادة اللي هتمتحن فيها متراجعش حاجة

- داخل الامتحان

فيه طريقتين علي حسب اللي يريحك

اول طريقة و اللي انا بفضلها

هي انك هتخط الورقة ومن غير ما تبصلها لمدة ٥ دقائق في ال ٥ دقائق دي انت بتدعي لا ماسك ورقة ولا قلم فا دا بيضيع شوية من رهبة الامتحان وخوفك وخدها بنيه انك بتظمن بذكر ربنا هتهدي بس متطولش عن ال ٥ دقائق

عشان وقتك مضيعش وبعدين تبدأ تقرأ الاسئلة كلها جمب كل سؤال وانت بتقرأ قيم نفسك مثلا انت هتعرف تحل السؤال دا كامل سؤال بعده هتقدر تحله بس مش اجابة نموذجيه سؤال تالت مش عارفه خالص ولو الاسئلة من النقط اللي انت عملتها خريطة ذهنية اكتب الكلمات الدلالية اللي كنت بتكتبها في الدواير الفرعية بحيث لما تيجي تحل تعرف ترتب الكلام صح والكلمات الدلالية هتفكرك

وابدأ جاوب علي السؤال اللي انت عارف حله كامل ومن ثم اللي مش هتجاوبه اجابة نموذجية هتلاقي ان التالت ممكن تفكره لان ايدك لما كتبت اجابة ممكن تستدعي معلومة انت كنت فاكرك مش هتفكرها خالص

لكن لو حصل انك بدأت باجابة السؤال الثالث اللي انت متعرفهوش خالص هيزيد التوتر ممكن متحلش السؤال اللي انت عارف اجابته كامله ويضيع و السؤال اللي اجابته كانت مش نموذجية اوي هتتلخبط فيه

لان المخ اتبعته اشارات انك غير قادر علي استدعاء اي معلومة وهفضل تفكر في السؤال الثالث اللي انت متعرفهوش فيضيع منك الاتنين التانيين

تاني طريقة و اللي انا مبفضلهاش

هي انك تحل بالترتيب من غير ما تبص علي باقي الاسئلة لان فيه ناس لما يتشوف الاسئلة كاملة بتتوتر وبتحس انها مش عارفة اي حاجة ويفضل برضو قدام كل سؤال قبل ما تكتبه في ورقة الاجابة تكتب زي مسودة للكلمات الدلالية قبل ما تحل السؤال

نسيت حاجة خالص ويفضل تكون سايبها للأخر يعني خلاص حليت كله بس دي مش قادر تفكرها ردد الدعاء دا اللهم يا جامع الناس ليوم لا ريب فيه اجمعني بضالتي او رد علي ضالتي وقول لا حول ولا قوة الا بالله

- بعد الامتحان

مترجعش خلاص انت حليت وورقتك اتسلمت يعني مش هترجع تاخذ الورقة تاني وتكتب اجابة سؤال كنت عامله غلط او مش حاله خلاص قدر الله وما شاء فعل انسي اللي فات ركز ان عندك امتحان تاني ولو اتشغلت بامتحانك الاول هيشغلك حيز كبير من مخك وانت محتاج تركز في المادة الجاية

- قواعد عصير النجاح العشرون (ملخص)

- ١- خلي هدفك من المذاكرة اعم و اشمل من انك بتذاكر عشان الامتحان
- ٢- شيل اي فكرة سلبية من دماغك و استبدلها بفكرة ايجابية
- ٣- استحضر النية حتي لو بسيطة
- ٤- كان الله في عون العبد ما دام العبد في عون اخيه (ساعد غيرك لا تكتم علم لو مش هيضرك او يسبب لك تشتت)
- ٥- صلتك بالله و صلاتك (حافظ عليها مش عيب انك تقرب لربنا وقت ضيقتك لكن العيب انك تبعد عنه بعدها)
- ٦- ابعد عن اي مصدر احباط وتوتر وقلق
- ٧- نظم وقتك وخلي نص ساعه يوميا مشي في الهوا بيجدد نشاط الجسم
- ٨- ركز في مذاكرتك و اعرف انها مهما كان فيها ضغط هي مرحلة انتقالية هتقلك لمرحلة تانية
- ٩- اعتمد اعتماد كلي علي الله و بلاش تعش استعين بقوة الخالق مش بالمخلوق
- ١٠- بلاش تليفونات كتير ليلة الامتحان بيضيع وقت ويزيد من التوتر
- ١١- بر والديك وخليهم يدعوك
- ١٢- متراجعش علي اي حاجة ولا تذاكر اي حاجة قبل الامتحان بنص ساعه
- ١٣- قبل الامتحان بساعتين اقرأ قراية سريعة الخرايط الذهنية بنفس الترتيب اللي كتبتة بإيدك و ملخص خطوات المسائل
- ١٤- نام كويس علي الاقل ٦ ساعات
- ١٥- جدد الهوا في المكان اللي بتذاكر فيه
- ١٦- كل حاجات مسكرة قبل المذاكرة ابعد عن الاكل الدسم كل خضار وفاكهه قلل من التدخين
- ١٧- اتقي الله وامن يتقى الله يجعل له مخرجاً ويزرقه من حيث لا يحتسب وامن يتوكل على الله فهو حسبه ان الله بالغ امره قد جعل الله لكل شيء قدراً {الطلاق: ٢- ٣}
- ١٨- متحبطش نفسك و تقول مثلا هيجيب مقبول قول بإذن الله هجيب امتياز كلها بتكون اشارات لمحك
- ١٩- خصص وقت معين للفيس لانه بيسرق الوقت و التزم بالوقت دا
- ٢٠- ادعي و استغفر كتير

- آلا بذكر الله تظمنن القلوب (ادعية)

دعاء قبل المذاكرة:

- اللهم اني اسألك فهم النبيين وحفظ المرسلين والملائكة المقربين.
- اللهم اجعل ألسنتنا عامرة بذكرك، وقلوبنا بخشيتك، انك على كل شيء قدير وحسبنا الله ونعم الوكيل.

دعاء بعد المذاكرة:

- اللهم اني استودعك ما قرأت وما حفظت وما تعلمت، فرده لي عند حاجتي إليه انك على كل شيء قدير، وحسبنا الله ونعم الوكيل.

عند التوجه الى الامتحان:

اللهم اني توكلت عليك، وسلمت امري إليك، لا ملجأ ولا منجى منك الا إليك.

عند دخول لجنة الامتحان:

رب ادخلني مدخل صدق وأخرجني مخرج صدق واجعل لي من لدنك سلطاناً نصيراً.

عند بداية الإجابة:

رب اشرح لي صدري، ويسر لي امري، واحلل عقدة من لساني يفقه قلبي، باسم الله الفتاح، اللهم لا سهل الا ما جعلته سهلاً، فإنك ان شئت تجعل الصعب سهلاً يا أرحم الراحمين.

عند تعسر الإجابة:

لا اله الا انت سبحانك اني كنت من الظالمين، يا حي يا قيوم برحمتك استغيث، رب اني مسني الضر وانت ارحم الراحمين.

عند النسيان:

اللهم يا جامع الناس ليوم لا ريب فيه اجمعني بضالتي.

او رد علي ضالتي

عند الانتهاء من الامتحان:

الحمد لله الذي هدانا لهذا وما كنا لنهتدي لولا ان هدانا الله.

لمزيد من الكتاب يرجى الإنضمام لجروب عصير الكتب

[/https://www.facebook.com/groups/Book.juice](https://www.facebook.com/groups/Book.juice)



لتقييم الكتاب

<https://www.goodreads.com/book/show/22097138>